

Yezebeli alikuwa ni mwanamke mwenye asili ya nchi ya Lebanoni, mahali pajulikanapo kama **Sidoni (1Wafalme 16:31)**, karibu sana na mji wa Tarshishi, ule amba Nabii Yona alienda kuhubiri, na alikuwa ni binti wa kifalme, hivyo alitokea katika familia tajiri.

Mwanamke huyu hakuwa Mwisraeli, ila aliolewa na Mfalme wa Israeli aliyeitwa **AHABU**, ikambidi ahame kutoka katika Taifa lake hilo na kuhamia Israeli, katika mji wa Samaria pamoja na miungu yake, na tamaduni zake.

Mfalme wa Israeli akamfanya kuwa Malkia, jambo ambalo **BWANA Mungu** alishalikataza kwa kinywa cha mtumishi wake Musa kuwa wana wa Israeli wasioe wanawake wa kimataifa, kwasababu watawageuza mioyo waabudu miungu mingin, Lakini Mfalme Ahabu alifumba macho yake asione hilo, na badala yake akamwoa **YEZEBELI**.

Na Yezebeli kwakuwa si Mwisraeli, bali alitoka Taifa lingine lenye miungu mingine, basi aliingia Israeli na miungu yake hiyo, na makuhani wake.. Hapo ndipo mambo yalipoanza kuharibika kwa wana wa Israeli... shida ikawa kubwa mpaka Bwana MUNGU kumnyanyua Eliya Nabii.

Sasa zifuatazo ni **roho (3)** alizokuwa nazo Malkia Yezebeli, zilizoliharibu Taifa la Israeli, na zinazofanya uharibifu leo katika kanisa

na nje ya kanisa.

1. UKAHABA

Hii ni sifa ya kwanza ya Malkia Yezebeli,..Biblia inasema alikuwa ni "**Mzinzi**", kwani ndiye mwanamke pekee aliyeonekana katika biblia kapaka **UWANJA** usoni na **KUJIPAMBA KICHWA!** Kwa lengo la kuvutia ukahaba..Hakuna mwanamke mwengine yoyote katika biblia yote anayetajwa kufanya mambo hayo..

2Wafalme 9:30 "Hata Yehu alipofika Yezreeli, Yezebeli akapata habari; AKATIA UWANJA MACHONI MWAKE, AKAPAMBA KICHWA CHAKE, akachungulia dirishani"

Yezebeli anamwona **YEHU** anakuja, kwa tabia yake ya uzinzi, anaanza kujiptaka uwanja machoni, na kupamba kichwa ili amlaghai YEHU apate kulala naye!. Na wala hata hakuwa na uchungu kwa kifo cha mwanae, yeeye anawaza uzinzi tu.

Roho hii inatenda kazi hata leo... huoni hata watu leo wanaenda misibani wamejipodoa... mahali pa kwenda kutafakari mwisho wa safari

ya mtu ulimwenguni, wengine wanaenda wamejipodoa kwa lengo la kuvutia ukahaba kama alivyofanya Yezebeli, katika msiba wa mwanae..

Roho hii imeingia mpaka makanisani, utaona wanawake na mabinti sehemu za ibada wanaingia kwa mionekano kama ya YEZEBELI, bila aibu wala hofu!..viungo vyao viro wazi, nguo walizovaa ni za nusu tupu, nyuso zimejaa rangi, na vichwa vimepambwa kama Yezebeli, na hawaambiwi chochote, na wala wenyewe hawasikii chochote ndani yao kikiwahukumu... pasipo kujua kuwa hiyo ni roho ya YEZEBELI, inaishi na kutenda kazi, kama ilivyokuwa enzi za mfalme Ahabu.

Dada, Mama acha kupamba uso!!!, ndani na nje ya kanisa, hiyo ni roho ya YEZEBELI, ya Ukahaba...usidanganywe na shetani kwa kukuambia kuwa ni urembo tu.. ni urembo tu!!.. hakuna urembo ndani ya sare ya kikahaba.. Utavaaje sare ya askari na ukasema ni urembo tu!!..



Na hii roho ya Yezebeli imeingia pia kwa wanaume,..kama mwanaume
anasuka nywele zake, na kupaka uwanja usoni, na kuvalaa nguo nusu
tupu, na kujichora mwili wake... roho ya Yezebeli inatenda kazi ndani
yake.

2. UCHAWI

Pamoja na kwamba Yezebeli alikuwa ni kahaba, biblia inasema pia

alikuwa ni mchawi.

Na Uchawi wa Yezebeli ulianzia nchini kwake alikotoka, kutokana na aina ya miungu aliyokuwa anaabudu. Kwani alikuwa anaabudu **“mungu baali”**, ambaye kwa asili makuhani wake wote walikuwa ni wachawi na Yezebeli ndiye aliyekuwa mkuu wao.

2Wafalme 9:22 “Ikawa, Yoramu alipomwona Yehu, akasema, Je! Ni amani, Yehu? Akajibu, Amani gani, maadamu uzinzi wa mama yako Yezebeli na UCHAWI WAKE NI MWINGI?”

Na uchawi wa Yezebeli mbali na kuloga, alikuwa pia ni mkaidi

3. NABII WA UONGO.

Ufunuo 2:20 “Lakini nina neno juu yako, ya kwamba wamridhia yule MWANAMKE YEZEBELI, yeye AJITAYE NABII na kuwafundisha watumishi wangu na kuwapoteza, ILI WAZINI na kula vitu vilivyotolewa sadaka kwa sanamu”.

Roho ya Yezebeli inawafundisha watu “**Kuzini**”.. Inawafundishaje?.. si kwa njia nyingine isipokuwa kwa injili ya kwamba “**Mungu haangalii mwili anaangalia roho**”... Injili hii, inawafanya watu wavae watakavyo..ili lile neno **Bwana YESU** alilolisema kuwa “**amtazamaye mwanamke kwa kumtamani amekwisha kuzini naye nafsini mwake**” litimie juu yao kupitia yale mavazi ya kikahaba wavaayo.

Dada/mama fahamu kuwa uvaapo mavazi ya kikahaba kama Yezebeli halafu mwanaume akikutamani tayari umekwisha kuzini naye, hata kama hajakushika mkono. (*wewe na yeye wote mmezini, na si yeye tu!.. bali hata na wewe, ambaye hujui kama umetamaniwa kwa mavazi yako*). Sasa jiulize unapotembea mtaani umeavaa nguo hizo za nusu uchi, umezini na wanaume wangapi!

Hii roho ya Yezebeli ipo makanisani leo!.. ipo kwa wengi wanaotambulika kama watumishi wa Mungu, hii ni roho ya Unabii wa Uongo, inayowafundisha watu **UZINZI!**, kwa kujua na kutokujua.

Hivyo jihadhari na injili hiyo ya adui, isemayo “Mungu anaangalia roho na haangalii mwili”.. Ulinde mwili wako usiwe chanzo cha kuipoteza roho yako moja kwa moja.

Na tabia ya hii roho ya **YEZEBELI** ni kushindana na Roho ya kweli ya

Mungu.. Ndio maana utaona Malkia Yezebeli katika Uzinzi wake, na uchawi wake na unabii wake wa uongo, hakuwahi kamwe kupatana na Nabii Eliya, wala kujinyenyeka kwake..zaidi sana utaona Yezebeli baada ya kusikia ishara Eliya aliyoifanya ya kushusha moto na kuwaua manaabii wake wa baali, aliapa kumlipa kisasi Eliya, na wala hakumwogopa hata Mungu. (Ni roho ya kiburi).

Roho hii ikishakita mizizi ndani ya mtu, inamfanya kuwa na kiburi, na mkatili hususani katika matumishi wa kweli wa Mungu, na inakuwa inamfanya mtu kuichukia njia ya kweli na watumishi wa Mungu wa kweli.

Jivue roho ya **UYEZEBELI.. Mvae BWANA YESU** (*Warumi 13:14*). Hizi ni siku za Mwisho na Bwana YESU anarudi.

Maran atha!

Washirikishe na wengine habari hizi njema kwa kushea

Ikiwa utapenda kupata msaada wa kumpokea Yesu maishani mwako bure, Basi wasiliana nasi kwa namba uzionazo chini ya makala hii.

JIHADHARI NA ROHO YA YEZEBELI.

Pia kwa kupokea mafundisho ya kila siku kwa njia ya WHATSAPP, jiunge na channel yetu kwa kupofya link hii >>

<https://whatsapp.com/channel/0029VaBVhuA3WHTbKoz8jx10>

Kwa mawasiliano: +255789001312 au +255693036618

Bwana akubariki.

Mafundisho mengine:

YEZEBELI ALIKUWA NANI

JINSI ROHO MTAKATIFU ANAVYOKUJA JUU YA MTU.

Roho Mtakatifu ni nani?.

KIMBIA! KIMBIA! KIMBIA!

**ROHO YA MPINGA KRISTO IKITENDA KAZI SIKU HIZI ZA
MWISHO**

Rudi Nyumbani

JIHADHARI NA ROHO YA YEZEBELI.

Share on:

WhatsApp

[Print this post](#)